

UKA 2025/147: Pisortat ingerlatsiviini kalaallit oqaasiisa pisortatigoortumik atuutsinneqalernissaasa saniatigut oqaatsit nutserneqartarnissaannut piumasaqaatip peersinneqarnissaa pillugu Naalakkersuisut allannguutissamik siunnersuummik suliaqaqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Pele Broberg, Naleraq)

Akissuteqaat

(Naalakkersuisut Siulittaasuat)

Aappassaanneerneqarnera

Inatsisartut Inatsisinut ataatsimiititaliaannut aalajangiiffigisassatut siunnersuut manna sukumiisumik suliarisimaneranut qujanaq.

Siunnersuutip siullermeerneqarnerani aalajangiiffigisassatut siunnersuummi matumani siunertarineqartut annertuumik isumaqatigiissutigineqarput, kisianni inatsimmi oqaatsinut piumasaqaatit akuerineqartariaqartumik siunertaqarsinnaanerak sukumiisumik nalilersorneqartariaqartoq, aamma nassuerutigineqarpoq. Taamaattumik Naalakkersuisut allannguutissatut siunnersuummik saqqummiussipput, taanna malillugu pisortat ingerlatsiviini pisariillisaanissamik suliaqarnermut atatillugu pisortat ingerlatsiviini nutserisarnerup annertussusianik pisariaqartinneqarneranillu naliliissummik ilanngusseqqullugit Naalakkersuisut siunnersuummi peqquneqartariaqaraluartik.

Taamatut isumaqarneq tapersersormagu Naalakkersuisut Inatsisinut Ataatsimiititaliaq isumaqatigiittoq qutsavigaat.

Inatsisinut Ataatsimiititaliap annertunerusumik erseqqissanissaq kissaatigigaa Naalakkersuisut maluginiarpaat, taamaalilluni nutserisarnerit pillugit immikkut nassuiaat, Inatsisartut kingusinnerpaamik UKA 2026-mi Inatsisartunut saqqummiunneqartussaq, allannguutissatut siunnersuummi ujartorneqarluni. Nutserinissamik piumasaqaatit peerneqassagualarpata inatsisit sorliit allanngortinneqartariaqarnerat pillugu nalunaarsuummik nassuiaat ilaatigut imaqassaaq.

Taamatut erseqqissanissaq inissaminiittoq Naalakkersuisut isumaqatigaat. Innuttaasut nammineq oqaatsitik atorlugit sullinneqarnissamut periarfissai inatsimmi isummerfigineqartillugu, nunani avannarlerni oqaatsinut nunani tamalaani isumaqatigiissutip pingaaruteqarnera, Inatsisinut Ataatsimiititaliap sammisimagaa, aammattaaq maluginiarneqarpoq.

Naalakkersuisut taamatut oqaaseqarlutik Inatsisinut Ataatsimiititaliap isummersornerat ilalarpaat aammalu allannguutit inatsisinut ataatsimiititaliamit isumaqatigiittumit siunnersuutigineqartut ilanngullugit aalajangiiffigisassatut siunnersuut akuerineqassasoq inassutigalugu.